

## SAMÞYKKT

### um hundahald í Þingeyrarhreppi

#### 1. gr.

Hundahald er bannað í hreppnum nema með leyfi hreppsnefndar að uppfylltum eftirfarandi skilyrðum:

- a) Hundurinn skal skráður hjá hreppsnefnd og merktur á þann hátt, sem hún ákveður. Við skráningu skal hundaeigandi undirrita yfirlýsingu um að hann skuli í einu og öllu fara með hund sinn eftir fyrirmælum samþykktar þessarar eins og hún er nú og síðar verður breytt.
- b) Eiganda er skylt að kaupa ábyrgðartryggingu hjá viðurkenndu váttryggingarfélagi, þannig að tryggt sé, að tryggingin taki til alls tjóns, sem hundur kann að valda án nokkurra óeðlilegra skilyrða að mati hreppsnefndar.
- c) Óheimilt er með öllu að láta hunda ganga lausa, nema smalahund á lögbýli, svo og minkahunda, dýrahunda og sporhunda, þegar þeir eru að störfum í gæslu eiganda eða umráðamanna, þó skal þess gætt að hundar á lögbýlum haldi sig heima. Verði vanræksla á gæslu þeirra, skal farið með mál þeirra samkvæmt 3. gr. þessarar samþykktar. Alla aðra hunda skal hafa í tryggu haldi, en heimilt er að hafa þá í taumi úti við í fylgd með manni, sem hefur fullt vald yfir þeim. Eigi er heimilt að hafa með sér hunda, þó í taumi séu, inn í skólahús, íþróttahús, sjúkrastofnanir, almennar skrifstofur, samkomuhús eða verslanir, svo og starfsstöðvar hverju nafni sem nefnast, þar sem úrvinnsla, meðferð, eða geymsla matvæla á sér stað.
- d) Hundaeigendum er skylt að sjá svo um að hundar raski eigi ró manna með hávaða eða galti, eða verði mönnum til óþæginda á annan hátt. Þegar hundar eru í festi á húsalóðum skal lengd festarinnar við það miðuð að óhindrað megi ganga um dyr íbúðarhúsa. Skilyrði fyrir hundahaldi í sambýlishúsum er að allir íbúðareigendur samþykki slíkt og skal leggja fram skriflegt samþykki þar um við skráningu hunds, er gildi þar til hreppsnefnd berst skrifleg afturköllun frá einhverjum íbúðareiganda.
- e) Til að standa straum af kostnaði hreppssjóðs af skráningu og eftirliti með hundum í hreppnum, skal hver hundaeigandi greiða árlegt gjald til hreppssjóðs. Gjaldið greiðist fyrirfram við skráningu hundsins til næstkomandi júlímánaðar og síðan árlega 1. júlí fyrir eitt ár í senn. Dráttarvextir falla á ógreidd leyfisgjöld eftir 1. september þar á eftir. Hafi greiðsla eigi átt sér stað að þremur mánuðum liðnum frá gjalddaga fellur leyfið sjálfkrafa úr gildi. Hreppsnefnd ákveður fjárhæð gjaldsins í sérstakri gjaldskrá, sem heilbrigðis- og tryggingamálaráðherra staðfestir og birt skal í B-deild Stjórnartíðinda.

Heimilt er hreppsnefnd að ákveða lægra gjald fyrir nauðsynlega minkahunda, dýrahunda, sporhunda og smalahunda. Af hundum, sem blindir menn og öryrkjar þurfa á að halda vegna fötlunar sinnar skal ekkert gjald greiða. Við greiðslu gjalds þessa ber hundeiganda að sýna fullgild skilríki fyrir greiðslu váttryggingargjalds samkvæmt b-lið þessarar greinar, váttryggingarskírteini, vottorð dýralæknis um að hundur sé ekki haldinn smitandi sjúkdómi og hafi verið hreinsaður af bandormum, svo og önnur skilríki er máli skipta samkv. lögum um hundahald og varnir gegn sullaveiki svo og fyrirælum, sem hreppsnefnd setur varðandi hunda.

- f) Hundaeigendum ber að viðhafa fullkomið hreinlæti í meðferð hunda sinna, þar á meðal að þrifa eftir dýrin.

2. gr.

Við brot á skilyrðum fyrir undanþágu til hundahalds er hreppsnefnd heimilt hvenær sem er að afturkalla leyfi fyrir einstökum hundum. Hreppsnefnd er heimilt að afturkalla öll leyfi, telji hún þess þörf. Verði leyfi fyrir hund afturkallað og eigandi hans afhendir hann ekki sjálfviljugur hreppsyfirvöldum, eða fjarlægir hann ekki úr kaптúninu skal fara með hann samkvæmt 3. gr. þessarar samþykktar.

3. gr.

Óleyfilega hunda skal lögregla taka hvar sem til þeirra næst og færa þá í sérstaka hundageymslu, sem starfrækt er á vegum hreppsins. Þar skulu hundarnir geymdir í allt að því eina viku, í umsjón og ábyrgð lögreglu meðan eigendum er gefinn kostur á því að koma þeim fyrir til frambúðar utan Þingeyrarkauptúns. Kostnaður við töku og geymslu hundanna skal að fullu greiddur af eigendum. Hirði eigendur óleyfilegra hunda ekki um að koma þeim í vörslu utan Þingeyrarkauptúns innan viku frá því að þeir eru teknir, né greiði af þeim áfallinn kostnað, skulu hundarnir aflífaðir.

4. gr.

Hunda, sem ráðast á menn eða skepnur, skal fjarlægja og lóga þegar í stað. Lögregla og hreppsnefnd skulu hafa eftirlit með hundum samkvæmt samþykkt þessari.

5. gr.

Með brot út af samþykkt þessari skal farið að hætti laga um meðferð opinberra mála og að öðru leyti í samræmi við ákvæði laga nr. 109/1984 VI. og VII. kafla.

6. gr.

Ofangreind samþykkt hreppsnefndar Þingeyrarhrepps staðfestist hér með skv. lögum nr. 7/1953, um hundahald og varnir gegn sullaveiki og 22. gr. laga nr. 109/1984 um hollustuhætti og heilbrigðiseftirlit, til þess að öðlast gildi þegar við birtingu. Jafnframt fellur úr gildi samþykkt um hundahald á Þingeyri nr. 221/1970.

*Heilbrigðis- og tryggingamálaráðuneytið, 30. maí 1985.*

F. h. r.

**Ingimar Sigurðsson.**

*Soffía P. Magnúsdóttir.*